



PARA alumni FPSK UMS bersama pelajar perubatan dan kejururawatan sedang memulakan pengagihan Love Bags di Wad Kanak-kanak, Hospital Likas.



DR YEAP (empat kanan) dan Timbalan Dekan (Pascasiswazah dan Penyelidikan) Prof. Madya Dr. Firdaus Hayati (dua kanan) mengambil gambar bersama pelajar perubatan sebelum mengagihkan Love Bags.

Persatuan Alumni UMS Anjur Program "Bags of Love" Di Hospital Likas

NST 26.5.2019 8

KOTA KINABALU: Persatuan Alumni Fakulti Perubatan dan Sains Kesihatan (PALM-FPSK) Universiti Malaysia Sabah (UMS) pada Jumaat telah menganjurkan suatu program kemasyarakatan di Hospital Wanita dan Kanak-Kanak Sabah (HWKKS) yang bertemakan "Bags of Love".

Program sehari itu merupakan julung kalinya diadakan dan disertai oleh Persatuan Pelajar Kejururawatan (NU-SA), Persatuan Pelajar Perubatan (MEDSTAS) UMS serta Bags of Love Malaysia bersempena dengan sambutan Hari Raya dan Kaamatan pada bulan ini.

Bags of Love Malaysia merupakan suatu gandingan rakan serta keluarga yang bertujuan menunjukkan keprihatinan terhadap masyarakat yang kurang bernasib baik dan miskin. Ia ditubuhkan pada tahun 2008 dan mereka sentiasa aktif untuk menabur bakti kepada masyarakat yang sentiasa memerlukan sokongan di seluruh Malaysia.

Program tersebut dirasmikan oleh Timbalan Dekan Hal Ehwal Pelajar dan Alumni FPSK UMS, Dr Yeap Boon Tat.

Beliau menyatakan bahawa program ini telah mencatatkan sejarah di FPSK di mana alumni yang terdiri daripada graduan doktor, jururawat dan juruteknologi makmal perubatan (JTMP) berserta pelajar-pelajar FPSK UMS berupaya menganjurkan aktiviti kemasyarakatan yang bersahsiah tinggi di peringkat negeri ini.

"Tahun ini, UMS merayakan ulang tahun Jubli Perak sempena penubuhan yang ke-25. Oleh itu, UMS dan FPSK ingin menunjukkan kepada

rakyat negeri Sabah sebagai universiti yang berpaksikan masyarakat.

"Kita bertekad untuk sentiasa cemerlang di dalam bidang perubatan dan membawa kemudahan perubatan kepada masyarakat setempat.

"Sebagaimana kita yang sedia maklum, Hospital Universiti Malaysia Sabah (HUMS) akan siap pada Januari 2021. Oleh itu, kita ingin menguar-uarkan kepada orang ramai tentang kewujudan FPSK dan HUMS di Sabah," ujar Dr Yeap yang merupakan graduan perubatan pertama FPSK UMS pada tahun 2003-2008.

Antara aktiviti yang berlangsung termasuklah penyampaian beg yang berisi barangan keperluan Hari Raya dan Kaamatan kepada pesakit-pesakit kanak-kanak di HWKKS oleh Presiden Bags of Love Malaysia, Nur Davina Skymmar bersama para alumni dan pelajar FPSK.

"Penyampaian goodie bags ini diharapkan berupaya mengurangkan kesengsaraan hidup dan membawa kegembiraan kepada pesakit kanak-kanak di HWKKS sempena Hari Raya dan Kaamatan ini. Kita berdoa agar mereka cepat sembuh supaya dapat beraya bersama keluarga tersayang di kampung halaman," kata Davina.

"Kita berharap agar dapat meneruskan aktiviti ini bersama alumni FPSK di UMS dari semasa ke semasa. Aktiviti seperti ini adalah penting untuk merapatkan silaturahmi antara alumni dengan pelajar dan pensyarah FPSK UMS. Kerjasama erat ini diperlukan untuk memastikan FPSK sentiasa cemerlang untuk memakmurkan kesejahteraan komuniti di Sabah," tambah Dr Yeap lagi.